

U ovom broju, između ostalog, čitajte:

- **Utvrđena najniža plaća za 2025. godinu u iznosu od 1.000 KM**
- **Održane dvije vanredne sjednice i jedna redovna sjednica UO UPFBiH**
- **UPFBiH: Odluka o minimalnoj plaći bez reformskih zakona dodatno ugrožava radna mjesta i poslovanje**
- **UPFBiH odžalo konferenciju "Poslovno okruženje u FBiH i tržište BiH i EU: Stanje, prilike i perspektive"**
- **Predstavnici UPFBiH, Elektroprivrede BiH i Obrtničke komore FBiH razgovarali o ugovaranju tržišnog snabdijevanja električnom energijom za 2025. godinu**
- **Konstituirano novo Ekonomsko-socijalno vijeće FBiH**



Utvrđena najniža plaća za 2025. godinu u iznosu od 1.000 KM




Vlada Federacije BiH je, sjednici održanoj 30.12.2024. godine u Sarajevu kojom je po ovlaštenju premijera Federacije BiH predsjedavao zamjenik premijera Federacije BiH Vojin Mijatović, na prijedlog Federalnog ministarstva finansija, donijela Odluku o iznosu najniže plaće za 2025. godinu

Odlukom je propisano da se najniža plaća za period od 1. januara do 31. decembra 2025. godine utvrđuje u neto iznosu od 1.000 KM. Ova odluka stupa na snagu danom donošenja i objavit će se u Službenim novinama Federacije BiH.

Kako je obrazloženo, na osnovu člana 6. stav (1) Uredbe o metodologiji izračuna i usklađivanja najniže plaće, Vlada Federacije BiH, do 31.12. tekuće godine, odlukom utvrđuje najnižu plaću za narednu kalendarsku godinu. Najniža plaća za narednu godinu se utvrđuje ili usklađivanjem iste u skladu sa članom 5. Uredbe ili u iznosu većem od iznosa usklađene plaće, s tim da ista ne može biti niža od iznosa koji je bio utvrđen za prethodnu godinu. Najniža plaća za 2025. godinu, utvrđena je u skladu sa članom 6. stav (3) Uredbe, u iznosu višem od iznosa koji bi se dobio usklađivanjem. U skladu s navedenim, najniža plaća za period od 1. januara do 31. decembra 2025. godine utvrđena je u neto iznosu od 1.000 KM.

Na Ekonomsko-socijalnom vijeću FBiH ova odluka nije dobila podršku delegacije poslodavaca.

Održane dvije vanredne sjednice i jedna redovna sjednica Upravnog odbora UPFBiH



S ciljem pripreme Uredbe o minimalnim primanjima i stavova Udruženja poslodavaca u FBiH za zakazanu sjednicu Ekonomsko-socijalnog vijeće FBiH, 26.12.2024, 29.12.2024. i 30.12.2024. godine održane su sjednice Upravnog odbora UPFBiH čiji zaključci su bili usaglašavanje i utvrđivanje prijedloga pomenute uredbe i popune delegacije poslodavaca u sastavu ESV-a. Za člana delegacije poslodavaca imenovana je Snježana Koepruner.

Nadalje, usaglašen je tekst Uredbe o minimalnim primanjima i isti je dostavljen predsjedniku ESV-a koji je prijedlog proslijedio delegacijama Vlade FBiH i sindikata u okviru ESV-a te je prezentovan na sjednici ESV-a.

Nakon što je od strane delegacija Vlade FBiH i sindikata, prijedlog Uredbe odbijen na sjednici ESV-a, predstavnici Vlade FBiH usmeno su najavili, kao iznos, bez detalja, da će na sjednici Vlade FBiH biti predložena Odluka o minimalnoj plaći za 2025. godinu u minimalnom NETO iznosu od 1.000 KM.

Nakon što je Vlada na sjednici ipak utvrdila tekst Odluke o minimalnoj plaći u pomenutom iznosu, zakazana je sjednica UO na kojoj su članovi ukazali na ozbiljne posljedice i rizike donošenja ovako ishitrene odluke. Napomenuto je da poslodavci jesu za povećanje plaća radnika, ali na način kako je to moguće i održivo, kako je i najavljivano, a to je da poslodavci povećaju neto plaće radnika, a da će vlasti kroz fiskalne i druge neophodne reforme, smanjiti

obaveze poslodavaca prema državi i da će se na taj način popraviti položaj radnika.


Istaknuto je da ovakva neusaglašena odluka o važnim pitanjima poslovnog okruženja, a posebno prije donošenja najavljenog seta fiskalnih zakona, redefinisanja pitanja zdravstvenog osiguranja na teret poslodavaca, smanjenja parafiskalnih opterećenja, usklađivanja socijalnih davanja i dr., je ozbiljan dodatni namet poslodavcima i proizvest će vrlo izvjesne štete u poslovanju, smanjenju broja radnih mjesta, ugroziti konkurentnost naših kompanija, posebno na inozemnom tržištu, što će dodatno obeshrabriti investitore u FBiH.

Zaključeno je da preispita mogućnost pravnog reagovanja na ovu proceduralno i sadržajno problematičnu odluku, da se nastavi sa sistemskim djelovanjem i zaštitom statusa poslodavaca i jačanja ukupnog poslovnog okruženja, reagovati saopćenjem za javnost i pojačati komunikaciju sa javnosti i institucijama te pokrenuti procedure, zbog vanrednih vanjskih događaja ili promijenjenih ekonomskih okolnosti nastalih nakon sklapanja ugovora, koji se u vrijeme sklapanja ugovora nisu mogli predvidjeti, niti ih je ugovorna strana mogla spriječiti, izbjeći ili otkloniti za stavljanje van snage granskih kolektivnih ugovora.

Udruženje poslodavaca u FBiH: Odluka o minimalnoj plaći bez reformskih zakona dodatno ugrožava radna mjesta i poslovanje



Udruženje poslodavaca u FBiH održalo je večeras hitnu vanrednu sjednicu Upravnog odbora u



proširenom sastavu, a nakon danas održane sjednice Ekonomsko-socijalnog vijeća FBiH i sjednice Vlade FBiH na kojoj je Vlada FBiH donijela Odluku o minimalnoj mjesečnoj plaći radnika u iznosu od 1000 KM neto.

Nakon konstituirajuće sjednice ESV-a održane u utorak 24.12.2024. godine Udruženje poslodavaca je pripremlilo nacrt Uredbe o minimalnim primanjima radnika i isti je dostavljen predsjedniku ESV-a koji je prijedlog proslijedio delegacijama Vlade FBiH i sindikata u okviru ESV-a.

Nakon što je od strane delegacija Vlade FBiH i sindikata, prijedlog Uredbe odbijen na sjednici ESV-a, predstavnici Vlade FBiH usmeno su najavili da će na današnjoj sjednici Vlade FBiH biti predložena i vjerovatno i usvojena Odluka o minimalnoj plaći za 2025. godinu u minimalnom NETO iznosu od 1.000 KM. Za takvu odluku izjasnili su se predstavnici Vlade i sindikata, dok je delegacija poslodavaca nakon zatražene pauze i obavljenih internih konsultacija, obavijestila prisutne da je ovaj prijedlog poslodavcima neprihvatljiv, uz pojašnjenje određenih rizika ukoliko se takva odluka usvoji.

U međuvremenu je, nakon sjednice ESV-a, održana sjednica Vlade FBiH na kojoj je Vlada FBiH donijela Odluku o minimalnoj plaći za 2025. godinu u iznosu od NETO 1.000 KM mjesečno čime su izdvajanja za isplatu bruto plaća radnika sa obavezujućim porezima i doprinosima povećana za oko 61,5 % isključivo na teret poslodavaca i bez odobravanja bilo kakvih ranije najavljenih neoporezivih davanja!

Upravni odbor Udruženja poslodavaca FBiH ukazuje na ozbiljne posljedice i rizike donošenja ovako ishitrene odluke. Poslodavci jesu za povećanje plaća radnika, ali na način kako je to moguće i održivo, kako je i najavljivano, a to je da poslodavci povećaju neto plaće radnika, a da će vlasti kroz fiskalne i druge neophodne reforme, smanjiti obaveze poslodavaca prema državi i da će se na taj način popraviti položaj radnika. Utoliko je današnja sjednica Ekonomsko-socijalnog vijeća još jedna propuštena prilika da se ekonomsko-socijalni partneri pokažu odgovornim i da uz dijalog razmotre i usaglase očekivana i prihvatljiva rješenja. Naprotiv, stvari su vraćene nekoliko koraka unazad!

Današnja, neusaglašena odluka o ovako važnim pitanjima poslovnog okruženja, a posebno prije donošenja najavljenog seta fiskalnih zakona, redefinisanja pitanja zdravstvenog osiguranja na teret poslodavaca, smanjenja parafiskalnih opterećenja, usklađivanja socijalnih davanja i dr., ozbiljan je dodatni namet poslodavcima i proizvest će vrlo izvjesne štete u poslovanju, smanjenju broja radnih mjesta, ugroziti konkurentnost naših kompanija, posebno



na inozemnom tržištu, što će dodatno obeshrabriti investitore u FBiH.

Povećanje minimalnih plaća obavezno vuče i usklađivanje, odnosno povećanje svih drugih plaća, a također je dobro poznato da povećanje minimalne i prosječne plaće, za posljedicu ima i dodatna socijalna davanja na svim nivoima vlasti u BiH.

Šokantno za poslovnu zajednicu je da se vlast opredijelila za ovako veliko povećanje plaća radnika bez poduzimanja bilo kakvih fiskalnih reformi, bez najavljenih reformi zdravstvenog osiguranja, parafiskalnih rasterećenja i drugih olakšica koje su dugo najavljivane!


Odluka o ovako ekstremnom povećanju minimalnih plaća dolazi pred sami kraj godine, kada su poslovni planovi u većini kompanija već završeni i kada je nemoguće u većini slučajeva, ovako drastično povećanje plaće ukalkulisati u poslovne planove za narednu godinu.

U narednim danima, poslodavci će skupa sa ekonomskim stručnjacima i akademskom zajednicom analizirati stanje u koje su dovedeni i poduzeti mjere s ciljem očuvanja svojih kompanija i zadržavanja što većeg broja radnika na njihovim radnim mjestima.

Udruženje poslodavaca nakon donošenja ovakve odluke Vlade FBiH danas, naprosto je zatrpano reakcijama sa terena u kojima predstavnici privrednika, komora, udruženja i poslodavaca, ali i akademske zajednice, pa i vlasti i sindikata, iskazuju zabrinutost zbog ovako neodmjerene i neusaglašene odluke vlasti!

Već sutra, Udruženje poslodavaca u FBiH pokrenut će niz aktivnosti na zaštiti svojih kompanija i obrta od šteta koje će današnje Odluke očekivano izazvati, ako se hitno ne napravi paket mjera kojima će se kako je bilo i dogovoreno ranije, napraviti neophodan balans između potrebe rasterećenja poslovanja u FBiH, povećanja neto plaća radnika i očuvanja interesa javnih fondova u FBiH, a koje su se mjere očekivale i najavljivale od strane vlasti u prethodnom periodu!

Reagovanje ekonomiste Faruka Hadžića na Odluku o minimalnoj plaći za 2025. godinu



Ekonomista Faruk Hadžić osvrnuo se na današnju odluku Vlade Federacije Bosne i Hercegovine da minimalnu neto platu poveća sa 620 KM na 1.000 KM. Napomenuo je da će povećanje neto plate značiti i povećanje doprinosa sa 440 na 744 KM. Shodno tome, kako je ukazao, minimalna bruto plata će biti povećana sa 1.059 na 1.744 KM, što je povećanje od 685 KM.

"Iako je bilo najava da će se paralelno raditi na smanjenju doprinosa, preko kojih bi se finansirao rast plata, od toga za sada nema ništa. Šta vi mislite? Da li mislite da bi povećanje minimalne plate bilo bolje uz istovremeno smanjenje doprinosa? Kako bi poslodavci mogli reagovati na ovako povećane troškove rada? Da li se ovakve promjene mogu održivo provesti bez dodatnog pritiska na radnike i poslodavce? Zašto mislite da je Vlada odlučila povećanje minimalne plate iskoristiti i za povećanje doprinosa? Da li je to opravdano iz perspektive pravednosti prema radnicima i poslodavcima?" napisao je Hadžić.

Vijeće stranih investitora u BiH: Povećanje minimalne plate ugrožava poslovanje privrednika i dugoročno šteti radnicima




Povodom odluke Vlade Federacije Bosne i Hercegovine o povećanju minimalne plate, donesene 30.12.2024. godine, Vijeće stranih investitora u BiH izdalo je saopćenje koje prenosimo u cijelosti.

Vijeće stranih investitora u BiH (Foreign Investors Council - FIC) izražava ozbiljnu zabrinutost zbog odluke Vlade Federacije BiH kojom se, bez detaljnih analiza i projekcija, bez usaglašenosti s poslovnim sektorom, povećava minimalna plata u Federaciji BiH od 1. januara 2025. godine.

Ovakve odluke, donesene u posljednji trenutak, bez uvažavanja stvarnih ekonomskih okolnosti i mogućnosti prilagodbe, ne samo da ugrožavaju poslovanje privrednika nego i dugoročno štete radnicima, naročito onima s najmanjim primanjima.

Preliminarne analize jasno pokazuju da će ova odluka povećati troškove poslodavcima za više od 600 KM po radniku. Najveći udar osjetit će industrije poput tekstilne, drvoprerađivačke i automobilske, koje svakako posluju na granici održivosti. Posljedice će neminovno uključivati smanjenje broja radnih mjesta i otpuštanje radnika, zatvaranje pogona i slabljenje ekonomskog ambijenta u Federaciji BiH.



Dok poslodavci snažno podržavaju povećanje plata radnika, to se mora provoditi na način koji je ekonomski održiv. Kao što je već dogovoreno s Vladom, svako povećanje plata mora biti praćeno smanjenjem doprinosa, kako bi se teret ravnomjerno rasporedio. Odluka u svom sadašnjem obliku jednostrano opterećuje poslodavce, ugrožavajući njihovu sposobnost da očuvaju radna mjesta i nastave s ulaganjima.

Upozoravamo da će ovakva mjera dugoročno imati negativne posljedice upravo na one radnike čiju zaštitu navodno osigurava, jer će dovesti do smanjenja broja zaposlenih u najosjetljivijim sektorima.

Vijeće stranih investitora BiH (Foreign Investors Council of BiH - FIC) podržava napore drugih udruženja poslodavaca da se, u saradnji s Vladom i sindikatima, poduzmu hitne mjere kako bi se ova štetna odluka revidirala i izmijenila. Posljedice ove odluke su nesagledive i zahtijevaju promptnu reakciju svih uključenih aktera kako bi se zaštitili i radnici i privreda u cjelini.

Kao i u proteklih 18. godina, Vijeće stranih investitora u BiH će nastaviti raditi na stvaranju bolje investicione klime u Bosni i Hercegovini i daljnjem podsticanju produktivnog dijaloga sa resornim ministarstvima i donosiocima u vezi sa nekim od najznačajnijih zakona u BiH, te jačanju saradnje između javnog i privatnog sektora.

UPFBiH odžalo konferenciju "Poslovno okruženje u FBiH i tržište BiH i EU: Stanje, prilike i perspektive"



Udruženje poslodavaca u FBiH je u Sarajevu 09. decembra 2024. godine organizovalo poslovnu konferenciju "Poslovno okruženje u FBiH i tržište BiH i EU: Stanje, prilike i perspektive".

Konferenciji je prisustvovao veliki broj učesnika, između ostalih i predstavnici Delegacije EU u BiH, diplomatsko konzularne mreže u BiH, izvršne i zakonodavne vlasti na svim nivoima, federalnih i kantonalnih institucija, Vanjskotrgovinske komore BiH, Privredne/Gospodarske komore Federacije BiH, Obrtničke komore FBiH, Američke privredne komore, Unije poslodavaca RS, Vijeća stranih investitora, te akademske zajednice, sindikata, medija i poslodavaca.

Uvodna izlaganja dali su predsjednik Udruženja poslodavaca u FBiH Adnan Smailbegović, premijer Vlade FBiH Nermin Nikšić i zamjenik šefa Delegacije EU u BiH Adebayo Babajide.

Predsjednik Udruženja poslodavaca u FBiH Adnan Smailbegović je kroz detaljnu prezentaciju predstavio aktuelnu situaciju i poslovno okruženje. I ovaj put prioriteta su rasterećenje poslodavaca kroz smanjenje i ukidanje skupih fiskalnih i parafiskalnih nameta i nedostatak radne snage, ali i pitanja skupe zdravstvene zaštite, zaštite na radu, i dr. Drugo aktuelno pitanje je pitanje nedostatka radne snage i u tom kontekstu važnosti unaprjeđenja rada i

zapošljavanja domaće radne snage i pojednostavljenja procedura za uvoz stranih radnika. Smailbegović je naglasio i pitanja usklađivanja poslovanja u FBiH sa izazovnim europskim i drugim ino tržištem.



Također, predsjednik Udruženja ukazao je na zabrinjavajuće podatke o padu industrijske proizvodnje i izvoza, te smanjenju zaposlenosti u prerađivačkoj industriji, kao i na značaj zakonske regulative za poboljšanje tržišta rada i zadržavanje domaće radne snage.

Premijer FBiH Nermin Nikšić istakao je da Vlada Federacije ostaje opredijeljena

strateškim prioritetima koje je Vlada prezentovala na početku u svom programu, a to su fiskalna reforma, javne investicije, podrška poljoprivrednoj proizvodnji, stvaranje pretpostavki za borbu protiv korupcije i organiziranog kriminala, energetska tranzicija, odnosno stvaranje pretpostavki za ulaganje u obnovljive izvore energije. Premijer je ukazao i na važnost osiguranja balansa između potreba u sektoru socijalne zaštite PIO/MIO i drugo u odnosu na javne prihode.

"Europski put BiH je ključan interes Vlade i učinit će sve da usklade interese vlasti, poslodavaca i sindikata kako bi ostvarili novi zamah u europskim integracijama" kazao je Nikšić.



Zamjenik šefa Delegacije EU u BiH Adebayo Babajide rekao je da Unija podržava BiH kroz investicije država članica, podršku institucija Unije ali i kroz implementaciju Plana rasta za koju je izrazio nadu da će se aktivirati u BiH, čime bi se omogućile brže reforme bitne za poslovnu i ukupnu društvenu zajednicu.

U okviru konferencije održan je i stručni panel „Poslovno okruženje u BiH/FBiH: Ostvareni rezultati u 2024. godini i ključni ciljevi i izazovi u 2025. godini“, na kojem su govorili:

- potpredsjednica Upravnog odbora UPFBiH i direktorica GS TMT Snježana Kopruner,
- ekonomska savjetnica u Delegaciji EU u BiH Aida Soko,
- zastupnica u zastupničkom domu Parlamentarne skupštine BiH i predsjedavajuća Zajedničke komisije za ekonomske reforme i razvoj Ermina Salkičević-Dizdarević,
- predstavnik Saveza samostalnih sindikata BiH Samir Kurtović i
- prof. dr. Faruk Hadžić, Sarajevo School of Science and Technology (SSST)

To je bila prilika da jedna od najaktivnijih poduzetnica Snježana Kopruner govori o preprekama i izazovima pri investiranju i novom zapošljavanju, ali također i o važnosti brige o radnicima, radnoj snazi kao jednom od ključnih izazova u poslovanju ne samo u BiH već i šire.



Ermina Salkičević Dizdarević govorila je o planovima zajedničke komisije, poteškoćama u radu i izazovima za 2025. godinu, te naglasila važnost saradnje privrednika iz čitave BiH sa predstavnicima vlasti.

Prof. dr. Hadžić ukazao je na probleme fiskalnih i parafiskalnih opterećenja.

Tokom panela govorio je o najprihvatljivijim modelima za rasterećenje privrede i iskorak po predmetnim pitanjima i u tom kontekstu pitanja fiskalnih reformi, Zakona o fiskalizaciji transakcija u FBiH i dr. teme su koje trebaju dominirati politikama i propisima u ovoj oblasti u narednom periodu.




Aida Soko je u svom obraćanju naglasila ključne prioritete BiH kada je u pitanju europski put BiH a posebno neformalne europske integracije, kroz rješavanje konkretnih smetnji za nastup naših privrednika na europskom tržištu a u ovom času to su pitanja CBAM-a, boravka naših



radnika u zemljama EU, zelenoj ekonomiji i drugim velikim izazovima za BiH, koji su velika šansa za naš iskorak na europsko tržište. Europska unija garantira podršku BiH a od Bosne i Hercegovine očekuje se realizaciji minimuma uvjeta za povlačenje svake vrste podrške sa strane EU.

Konferencija je bila prilika da se na kraju godine zajednički analizira i ocijeni stanje u poslovnom okruženje u FBiH, odnosno čitavoj Bosni i Hercegovini, kao i za procjenu ključnih prioriteta za unapređenje poslovanja u narednoj godini kako u BiH/FBiH tako i na europskom tržištu.



Konferencija je otvorena prikazivanjem filma Jasmile Žbanić "Blum: Gospodari svoje budućnosti" što su na kraju i ključne poruke konferencije da nadležne institucije, predstavnici vlasti, poslodavaca, sindikata i civilnog sektora svako iz svoje perspektive može i treba učiniti više kako bismo unaprijedili poslovno unapređenje i generalni standard građana u BiH.

Predstavnici UPFBiH, Elektroprivrede BiH i Obrtničke komore FBiH razgovarali o ugovaranju tržišnog snabdijevanja električnom energijom za 2025. godinu



Izvršni direktor za snabdijevanje i trgovinu Javnog preduzeća Elektroprivreda Bosne i Hercegovine d.d. - Sarajevo Nevad Ikanović, razgovarao je s predstavnicima Udruženja poslodavaca u Federaciji Bosne i Hercegovine i predstavnicima Obrtničke komore Federacije Bosne i Hercegovine o ugovaranju tržišnog snabdijevanja električnom energijom za 2025. godinu, uključujući ugovaranje tržišnog snabdijevanja za mjerna mjesta na niskom naponu kupaca koji su u skladu s novim Zakonom o električnoj energiji Federacije Bosne i Hercegovine („Službene novine Federacije BiH”, broj: 60/23) i podzakonskim propisima od 01.09.2024. godine ostali bez prava na snabdijevanje električnom energijom u okviru javne usluge.

Prethodno se ne odnosi na kupce iz kategorije domaćinstva, kao ni na listu malih kupaca i listu kupaca od posebnog društvenog značaja koje je utvrdio Operator distributivnog sistema Javnog preduzeća Elektroprivreda Bosne i Hercegovine d.d. - Sarajevo, čiji se status neće promijeniti i koji zadržavaju pravo na korištenje javne usluge snabdijevanja električnom energijom.

Javno preduzeće Elektroprivreda Bosne i Hercegovine d.d. - Sarajevo, u skladu sa Zakonom o

električnoj energiji Federacije BiH, u mjesecu novembru započela je obavještanje kupaca o isteku ugovora o snabdijevanju električnom energijom za tržišno snabdijevanje zaključenih za 2024. godinu, putem dopisa.

Uz obavještenje o isteku ugovora o snabdijevanju električnom energijom za tržišno snabdijevanje za 2024. godinu, Javno preduzeće Elektroprivreda Bosne i Hercegovine d.d. - Sarajevo kupcima nudi nove ugovore o snabdijevanju električnom energijom za tržišno snabdijevanje za 2025. godinu, uvrštavajući u iste i mjerna mjesta koja su od 01.09.2024. godine prešla sa javne usluge snabdijevanja na tržišno snabdijevanje električnom energijom a zbog gubitka prava na javnu uslugu snabdijevanja, u skladu sa zakonskim i podzakonskim propisima.

Ukupan broj kupaca koji se snabdijevaju električnom energijom u okviru tržišnog snabdijevanja je približno 3110. Prethodno je u periodu juni-august za dio 2025. godine ugovore za tržišno snabdijevanje sa Javnim preduzećem Elektroprivreda Bosne i Hercegovine d.d. - Sarajevo potpisalo oko 2300 kupaca ili 74% od ukupnog broja kupaca na tržišnom snabdijevanju. Trenutno je predmetom ugovaranja tržišnog snabdijevanja za 2025. godinu oko 810 kupaca ili 26% od ukupnog broja kupaca u okviru tržišnog snabdijevanja.

Prema projekcijama, manje od 15% kupaca koji su trenutno predmetom ugovaranja tržišnog snabdijevanja će u 2025. godini imati povećanje ukupnih troškova (bez PDV-a) za električnu energiju veće od 20% u odnosu na tržišne uvjete iz 2024. godine, pri čemu se radi o kupcima koji pored mjernih mjesta na srednjem/visokom naponu imaju potrošnju na niskom naponu na mjernim mjestima za koja su izgubili pravo na javnu uslugu snabdijevanja počevši od 01.09.2024. godine.

Oko 40 kupaca (cca 5% od ovih kupaca) će u 2025. godini imati povećanje ukupnih troškova za električnu energiju (bez PDV-a) veće od 30% u odnosu na tržišne uvjete iz 2024. godine, a manje od 5 kupaca (manje od 0.5%) će imati povećanje ukupnih troškova između 50 i 60% u odnosu na tržišne uvjete iz 2024. godine.

Generalno, više od 40% novih kupaca na tržišnom snabdijevanju, a koji su ranije zbog gubitka prava na javnu uslugu snabdijevanja u skladu s novim Zakonom o električnoj energiji Federacije BiH, zaključili ugovore o tržišnom snabdijevanju za period koji obuhvata i dio 2025. godine će za dati dio 2025. godine imati povećanje troška za električnu energiju (bez PDV-a) manje od 30%, pri čemu će neki kupci imati i smanjenje ukupnog troška, a što u prvom redu ovisi o omjeru potrošnje električne energije u periodima veće i manje dnevne tarife te načina

korištenja vršnog opterećenja. Oko 165 kupaca (cca 7%) predmetnih kupaca će za dio 2025. godine imati povećanje troška za električnu energiju (bez PDV-a) veće od 50%.

Prema projekcijama povećanje troška za električnu energiju (bez PDV-a) za 2025. godinu do 10% u odnosu na 2024. godinu će imati oko 800 kupaca ili 26% od ukupnog broja kupaca na tržišnom snabdijevanju. U rasponu 10-20% povećanje troška za električnu energiju (bez PDV-a) za 2025. godinu će imati oko 290 kupaca ili 9% od ukupnog broja kupaca na tržišnom snabdijevanju. U rasponu 20-30% povećanje troška za električnu energiju (bez PDV-a) za 2025. godinu će imati oko 660 kupaca ili 21% od ukupnog broja kupaca na tržišnom snabdijevanju. U rasponu 30-40% povećanje troška za električnu energiju (bez PDV-a) za 2025. godinu će imati oko 825 kupaca ili 27% od ukupnog broja kupaca na tržišnom snabdijevanju. Povećanje troška za električnu energiju (bez PDV-a) veće od 40% za 2025. godinu veće od 40% će imati 530 kupaca ili 17% od ukupnog broja kupaca na tržišnom snabdijevanju.

Javno preduzeće Elektroprivreda Bosne i Hercegovine d.d. - Sarajevo poziva kupce kojima ugovori o snabdijevanju električnom energijom za tržišno snabdijevanje ističu zaključno sa 31.12.2024. godine na pravovremeno zaključivanje novih ugovora o tržišnom snabdijevanju, imajući u vidu da je novim Zakonom o električnoj energiji Federacije Bosne i Hercegovine propisano da je snabdjevač dužan najkasnije tri dana prije početka snabdijevanja krajnjeg kupca nadležnom operatoru sistema prijaviti ugovor, odnosno svaku promjenu ugovora i dostaviti podatke o krajnjem kupcu, mjestima primopredaje, vrsti ugovora i periodu snabdijevanja.

Također, treba voditi računa da u slučaju promjene snabdjevača na tržištu postupak promjene snabdjevača traje do 21 dan.

U slučaju da kupac pravovremeno ne odabere snabdjevača na tržištu električne energije, u skladu sa Zakonom o električnoj energiji Federacije Bosne i Hercegovine ima pravo na korištenje usluge rezervnog snabdjevača u periodu do 90 dana, za koju svrhu je neophodno potpisati ugovor o rezervnom snabdijevanju najkasnije u roku od osam dana od dana početka rezervnog snabdijevanja. Ukoliko krajnji kupac ne zaključi ugovor za rezervno snabdijevanje u roku od osam dana od dana prijema ugovora operator sistema vrši obustavu isporuke električne energije na zahtjev rezervnog snabdjevača, a krajnji kupac je dužan da plati preuzetu električnu energiju.

Konstituirano novo Ekonomsko-socijalno vijeće FBiH



Ekonomsko-socijalno vijeće za područje Federacije Bosne i Hercegovine konačno je 24.12.2024. godine održalo konstituirajuću sjednicu.

Za predsjednika je izabran Safudin Čengić. On je na poziciji predsjednika ESV-a zamijenio Edhema Bibera, koji je bivši predsjednik Saveza samostalnih sindikata BiH.

Na konstituirajućoj sjednici verificirani su i članovi delegacija iz Udruženja poslodavaca FBiH, sindikata i Vlade FBiH.



Najavljeno je da će se nova sjednica Ekonomsko-socijalnog vijeća za područje Federacije Bosne i Hercegovine održati 30. decembra ujutro, sa Uredbom Vlade FBiH o minimalnim primanjima na dnevnom redu, a očekuju se i neke druge konkretne teme.

Udruženje poslodavaca u FBiH zatražilo hitan sastanak sa federalnim ministrom trgovine



Nakon saznanja da je odobreno izuzeće za neradnu nedjelju prodajnih objekata na teritoriji Orašja, Udruženje poslodavaca u FBiH zatražilo je hitan sastanak sa federalnim ministrom trgovine s ciljem rješavanja problema po predmetnim pitanjima i zaustavljanja potencijalne štete u poslovanju trgovaca u FBiH.

Udruženje poslodavaca u FBiH podržalo sajam poslova "Gledaj sebi posla"

Udruženje poslodavaca u FBiH učestvovalo je na sajmu poslova koji je organizovalo Federalno ministarstvo rada i socijalne politike uz podršku Federalnog zavoda za zapošljavanje, Fonda za profesionalnu rehabilitaciju i zapošljavanje osoba sa invaliditetom i organizacijom UN Women. Na otvaranju sajma prisustvovao je direktor Udruženja Mario Nenadić i sekretarka Mersiha Jusić.

Sajam je u hotelu Hills okupio više od stotinu poslodavaca iz različitih sektora u Federaciji BiH koji su još tokom sajma ponudili oko 3.000 radnih mjesta. Sajam zapošljavanja je pored poslodavaca privukao i veliki interes nezaposlenih osoba i onih koji traže promjenu u karijeri

gdje su kompanije tokom sajma zaprimile više od 2000 prijava za posao. Poslodavci su na zakupljenim štandovima protekla dva dana obavili veliki broj susreta i razgovora sa potencijalnim kandidatima koji su iskazali interes za tražene poslove.



Oba dana održavanja sajma i samo Udruženje poslodavaca u FBiH je imalo svoj štand na kojem su zainteresirani mogli prikupiti sve potrebne informacije. Udruženje je zaprimilo i određen broj direktnih prijava za posao, kao i biografije koje će dostaviti svojim članicama u odnosu na zanimanje i interes radnika. Pored toga, Udruženje je tokom sajma upućivalo radnike prema štandovima članica s ciljem ostvarenja direktnog kontakta sa poslodavcima.

Sajam poslova „Gledaj sebi posla“ prema ocjeni predstavnika Udruženja bio je odlična inicijativa od koje se očekuje i konkretno povezivanje radnika i poslodavaca, kao i stvaranje jasnije slike o raspoloživom interesu poslodavaca za radnom snagom kao i o aktivnim tražiteljima posla sa strane nezaposlenih u FBiH.

Međunarodna konferencija o obrtu: "Položaj obrtnika - primjeri dobre prakse u regiji" održana u Tuzli



Međunarodna konferencija "Položaj obrtnika - primjeri dobre prakse u regiji", koja je okupila ugledne predstavnike obrtničkih sistema iz regije, uključujući Hrvatsku, Sloveniju, Republiku Srpsku, kantonalne komore Federacije Bosne i Hercegovine, udruženja poslodavaca i obrtnika, privrednih komora te brojne nadležne federalne i kantonalne institucije, kao i jedinice lokalne samouprave organizirana je uz podršku Federalnog ministarstva razvoja, poduzetništva i obrta, a implementirala ju je Obrtnička komora Federacije Bosne i Hercegovine u suradnji s kantonalnim obrtničkim komorama. Konferenciji je prisustvovao direktor UPFBiH Mario Nenadić.

Cilj konferencije bio je razmjena primjera dobre prakse i uspostava čvršće regionalne saradnje u cilju stvaranja povoljnijeg poslovnog ambijenta za obrtnička zanimanja. Naglasak je stavljen na ključne izazove s kojima se suočavaju obrtnici, poput visokih doprinosa, složene administracije, ograničenog pristupa finansijskim sredstvima i nedostatka kvalificirane radne



snage, kao i na mogućnosti unapređenja zakonskih okvira i inovacija u sektoru obrtništva.

Otvarajući konferenciju, predstavnici organizatora naglasili su kako su obrtnici neizostavan dio privrednog i društvenog tkiva regije. "Naša kreativnost, inovativnost i upornost pokreću privredu i daju dodatnu vrijednost našim zajednicama. Ova konferencija pruža platformu za dijalog, razmjenu iskustava i pronalaženje zajedničkih rješenja koja će pomoći obrtnicima u regiji," istaknuto je u uvodnom obraćanju.

Konferencija je obuhvatila niz panel diskusija i prezentacija koje su se fokusirale na primjere dobre prakse iz regije. Sudionici su podijelili uspješne pristupe u unapređenju zakonskih i administrativnih procedura, modernizaciji obrtništva i poticanju obrazovanja i osposobljavanja za obrtnička zanimanja. Posebno je istaknuta važnost ulaganja u obrazovanje mladih, koje predstavlja temelj za održivi razvoj sektora.

"Jedan od ključnih ciljeva ove konferencije je jačanje saradnje između obrtničkih komora regije kako bismo kroz zajednički rad stvorili povoljniji poslovni ambijent za obrtnike," naglasili su organizatori. Također, istaknuta je važnost očuvanja tradicije i kulturnog identiteta kroz obrtništvo te modernizacije sektora koja će omogućiti širi pristup tržištu.

Konferencija je zaključena pozivom na nastavak regionalne saradnje i definiranjem konkretnih koraka za unapređenje obrtništva, s naglaskom na podršku mladima, osiguranje pristupačnih uvjeta za poslovanje i poticanje inovacija. Sudionici su izrazili uvjerenje da će rezultati ove konferencije doprinijeti jačanju sektora obrtništva i razvoju poduzetništva u Bosni i Hercegovini i šire.



UDRUŽENJE POSLODAVACA

UDRUŽENJE POSLODAVACA FBiH
MARŠALA TITA 6, 71 000 SARAJEVO

TEL: 00 387 264 830

FAX: 00 387 33 552 461

MAIL: info@upfbih.ba

WEB: www.upfbih.ba